

JARDUNALDIAK. Aditu ugari izango dira 'Indarkeria ez aktiboa' izenburuko jardunaldietan, bihartik aurrera

Indarkeria eza eta desobedientzia zibila izango dituzte hizpide

Euskal Herrian ere erabil daitezkeela diote Gipuzkoako Eragozpen Taldeko kideek

Leire Aramendi | DONOSTIA

Indarkeriarik eza izango dute mintzagai bihartik aurrera Donostian elkartuko diren hainbat adituk. Gizartea aldatzen saiatzeko edo helburu bat lortzeko kontuan hartu beharreko tresna dela uste dute Gipuzkoako Eragozpen Taldeko kideak, hain zuzen ere, *Indarkeria ez aktiboa* jardunaldien antolatzaileak direnak. Beste hainbat kasutan gertatu bezala, «indarkeria ez aktiboa» Euskal Herrian ere erabil daitezkeela adierazi zuten Eragozpen Taldekoek, atzoko aurkezpenean.

Ondorioz, «indarkeria ez aktiboa eta desobedientzia zibila bultzatzea» da jardunaldi horiekin lortu nahi duten helburua.

Indarkeriarik ezak «parte hartzea eta injustiziaren aurka borrokatzea» esan nahi duela uste du Patxi Azparrenek, Eragozpen Taldeko eta Autodeterminazioaren Biltzarreko (ABK) kideak. Borrokarako modu eta helburuen arteko «koherentzia» gordetzen duen tresna dela dio Xabier Huizi Kontzientzia Eragozpen Mugimenduko

kideak ere (KEM). Horrek «bideak ireki» eta «erraztasunak» ematen dituela azaldu zuen Huizik.

Euskal Herriko nahiz nazioarteko hainbat erakunde eta elkarteren ordezkariak hartuko dute parte jardunaldietan: Greenpeace, Mugarik Gabe, Amnesty International, Bakearen Aldeko Koordinakundea, Elkarri eta Bakearen Aldeko Nazioarteko Brigadak, besteak beste.

«Historia egin edo historia egiten lagundu duten pertsonak» dira, antolatzaileen aburuz. Beste batzuek, berriz, bide berriak zabaldu dituzte.

Hainbat ikuspegi aztergai

Hitzaldi horietan, iritzi desberdinetako jendeak hartuko du parte, eta bakoitzak bere esperientzia eta ikuspegitik azalduko du zer den indarkeriarik ez aktiboa; iritzi guztiak ezagutaraztea da helburua.

Aditu horien bidez, hainbat alderdi jorratuko dituzte. Bihar eta ostiralean, esperientzia pertsonala eta kolektiboa izango dituzte abiapuntu; abenduaren 3an, mugimendu antimilitaristen



JUAN CARLOS RUIZ / ARGAZKI PRESS

Noelia Txarro, Patxi Azparren, David Alonso eta Xabier Huizi, atzo, jardunaldien aurkezpenean.

taren 25. urteurrena dela-eta, mugimendu horren alde lan egin dutenak izango dira hizlari; abenduaren 4an, berriz, Euskal Herriko egoera aztertuko dute. Azken egunean, Jean Marie Mullerrek, indarkeria ez aktiboren inguruan esperientzia handiko Frantziako adituak, gogoea egingo du kontzeptu horren gainean.

Bihar, lehenengo egunean, Pepe Beunza Espainiako Estatuko lehen objektorea izango da Donostiako Koldo Mitxelenan. 70eko hamarkadan soldadutzari uko egin ondoren, gaur egungo intsumisioaren «abiapuntua» dela esan zuen Xabier Huizik. Harekin batera, EHNE sindikatuko kide Paul Nicholson egongo da.

EGITARAUA

AZAROAK 28, OSTEGUNA

19:00: *Indarkeria ez aktiboaren esperientzia pertsonala*, Koldo Mitxelenan. Hizlariak: Paul Nicholson (EHNE) eta Pepe Beunza (idazlea eta Espainiako lehen objektorea). Moderatzailea: Xabier Sarasua.

AZAROAK 29, OSTIRALA

19:00: *Indarkeria ezaren esperientzia kolektiboak*, Koldo Mitxelenan. Hizlariak: Victoria Moreno (Dones x Dones), Dolores Romano (Greenpeace), Andres Krakenberg (Amnesty International) eta Francesc Riera (Bakearen Aldeko Nazioarteko Brigadak). Moderatzailea: Sabino Ormazabal.

ABENDUAK 3, ASTEARTEA

19:00: *Borroka antimilitaristen 25. urteurrena*, Kresala Elkartean. Hizlariak:

Mabel Cañada (Bakearen Etxea), Rafa Aldai (Mugarik Gabe), Cesar Manzanos (Salhaketa), Rafa Sainz de Rozas (EHUko irakaslea). Moderatzailea: Patxi Azparren (Autodeterminazioaren Biltzarrek).

ABENDUAK 4, ASTEAZKENA

19:00: *Indarkeriarik eza Euskal Herrian gaur egun*, Kresala Elkartean. Hizlariak: Jon Sarasua (intsumisioa eta irakaslea), Xabier Askasibar (Bakearen Aldeko Koordinakundea), Jonan Fernandez (Elkarri) eta Zuzen Taldea. Moderatzailea: Mariano Ferrer.

ABENDUAK 16, ASTELEHENA

19:00: *Indarkeriarik ez aktiboa zer da?* Hizlaria: Jean Marie Muller (idazlea). Moderatzailea: Gorka Torre.

EGOZTE AUZIA. Ez dauka Frantzian bizitzeko baimenik, eta Estatuko Kontseiluak ebatzi beharko du zein egoeratan gelditzen den

Aitor Renteria | BAIONA

Baionako Auzitegiak libre utzi zuen atzo Bulent Cilgi 27 urteko kurdia. Azaroaren 16an Pirinio Atlantikoetako prefetak Cilgik Irakera itzuli behar zuela agindu zuen, Frantzian bizitzeko baimenik ez zuelako. Irakera itzuliz gero, paira ditzakeen arriskuak hartu ditu aintzat epaimahaiak, prokuradorearen eskaria baztertu eta prefetaren erabakia bertan behera uzteko.

Cilgi 1975ean sortu zen, Kurdistanen, Iraken menpean dagoen eremuan. 19 urterekin armadara joateko deia jaso, eta alde egin zuen. «Armadara joaten garelarik, irakiarrek gerra guneetara eramaten gaituzte kurdia, hots, Kurdistanen berean

Baionako Auzitegiak libre utzi du prefetaren egozte agindua bete ez zuen kurdia

gure anaien aurka borrokatzea», azaldu zuen Cilgik, armadari uko egin izana arrazoitzeko. Bera baino lehen, adin horretara heltzerakoan, familiako gainerako senideek ere ihes egin zuten: anaia batek Ameriketara, beste batek Alemaniara, eta bertze hiru senidek Frantziara.

Cilgi Marseilla eta Pauen bizi izan da zortzi urtez, eta hargin egin du lan, paperik gabe. «Orain hara igortzen banauzue, badakizue zer dudan: irakiarrek berehala atxilotuko naute, eta, hiru urteko espetxealdia bete ondoren, Kurdistanera eramaten naute, nire anaien aurka ge-

rra egitera», azaldu zion Cilgik Dominique Piot epaileari.

Tortura, eguneroko ogia

Tortura Irakeko kurduek eguneroko pairatzen duten errealitatea dela azaldu zuen Corinne Raynalek, Cilgiren abokatuak. «Kontuan hartuz lehenik bere anaiek eta ondoren Cilgik armadari uko egin diotela, Irakera eramanez gero, argi dago ematen dioten tratua: preso sartu, aldian aldiko zafaldiak eman, eta bere herriaren kontra gerra egitera behartu gero», azaldu zuen, eta 2002ko torturatuen zerrenda erakutsi.

Cilgik Frantzian bizitzeko eskaria egin zuen, baina abokaturik ez zeukanez, eskariak behar ez ziren tokietara bideratu zituen, eta iheslari politikoen ardura duen OFPRAK ukatu egin zion eskubide hori.

Alabaina, Frantziako legeen arabera, bost urte baino gehiago bertan biziz gero eta familia-ekin harreman estuak badaude, ezin da inor egotzi. Legeak horrela badio ere, prozedurak baimena ukatzean prefetak mugara eramateko erabakia hartu zuen, legearen xehetasun horiek kontuan hartu gabe.

Iragan larunbatean, Poliziak

Miarritzeko aireportura eraman zuelarik Irakera egozteko, Cilgik uko egin zion hegazkinera igotzeari. Geroztik preso atxiki dute, atzoko epailetara arte.

Artean, Cilgiren abokatuak ebazpenaren aurkako helegitea aurkeztu zion Estatuko Kontseiluari, baina administrazio epaitegiak erabakia hartu aitzin bi urte ere iragan daitezke. Ebazpena eman arte, Poliziak prefetaren agindua indarrean ezar dezake, eta atxilotua egotzi.

Bulent Cilgiren kasuak giza eskubideen aldeko taldeen sostengu zabala du, eta epailetan izan ziren, elkartasuna adierazteko. Orain, Cilgik Pauko Prefeturara joan beharko du, Frantzian bizitzeko eskubidea berriz eskatzera.